



太平寰宇記卷第十九

河南道十九

淄州  
齊州

淄州

淄州

淄川郡今淄川縣

禹貢青州之域星分危宿十四度周

之九州為幽州之境職方氏幽州其浸菑時州蓋

取菑水為名也春秋及戰國時屬齊秦置三十六

郡為齊郡之地在漢為濟南郡之般陽縣屬濟南

樂安三國尋又置臨朐國於此其城迄今一名臨

淄城一名齊城晉屬樂安國宋元嘉五年於此置  
清河郡仍於州理立貝丘縣後魏又為東清河郡  
高齊天寶七年廢清河郡以貝丘屬齊郡開皇十  
六年於今理改置淄州大業二年廢淄州三年屬  
齊州又改為齊郡隋亂陷於寇賊唐武德元年重  
置淄州領淄川長白菜蕪三縣六年廢長白菜蕪  
二縣八年又以廢淄州之長山高苑蒲臺三縣未  
屬天寶元年為淄川郡乾元二年復為淄州景龍  
元年分高苑置濟陽縣又併入高苑又割蒲臺隸  
之

元領縣五

今四

淄州

長山

高苑

鄒平

一縣廢

濟陽

入高苑

州境

東西一百二十五里

南北一百八十二里

四至八到

西南至東京八百四十五里

西南至西京一千二百四十里

西南至長安三千二十五里

東至青州一百二十里

南至兗州三百七十里

西至齊州二百里

北渡河至棣州二百一十里

東南至沂州五百二十里

西北至齊州五百二十里

東北至青州一百里

戶

唐開元戶四萬二千七百三十七

皇朝戶主一萬一千二百八十二客一萬八千七

八百七十

風俗

與青州同

人物無

土產

貢防風石長理石出絕絹麻布

淄川縣舊十七鄉本漢般陽縣也屬濟南郡在般水

之陽故名後漢屬齊國晉有宋元嘉五年於此置

貝丘縣屬清河郡高齊廢郡縣屬齊州隋開皇十

六年於此置淄州貝丘縣屬焉十八年改貝丘為  
淄川縣大業二年廢淄川縣屬齊州唐武德元年  
重置淄川縣仍隸之。原山在縣東南七十里地  
理志曰原山淄水之所出也。商山在縣北七十  
里有鉄鑛古今鑄焉亦出磁石。籠水古名孝水  
輿地志曰齊有孝婦顏文姜事姑孝養遠道取水  
不以寒暑易心感得靈泉生於室內文姜常以緝  
籠蓋之姑怪其須水即得非意相供值姜不在私  
入姜室去籠觀之水即噴湧壞其居宅故俗亦呼  
為籠水今按水自發源去縣五十里始流經州西

去城一百五十步有般水注之又流入長山縣界  
。般水亦名左阜水源出縣東南龍山般陽縣在  
般水之陽謂此水也今按般水發源去縣二十里  
經縣理南去一百二十步又西北流入籠水。州  
理城本漢般陽縣城也道書福地記云般陽山自  
生黍可食按此縣界無般陽山當謂般陽縣界有  
此山也。蠶山在縣東北十里三齊略記曰鄭玄  
刊注詩書曰栖遲於此山上有古井不竭獨生細  
草葉形似菲俗謂鄭公書帶艸。康浪水即寧戚  
叩角歌之處。淄水源出縣東南原山禹貢濰淄

其道鄭注淄水出太山萊蕪縣淮南子謂之水出  
館山蓋原山別名又田巴對齊王曰臣侍妾皆謂  
臣美及臣鑿淄水方知自醜。萊蕪故城按縣昔  
齊靈公滅萊，人播流於此地，邑落荒蕪，故以萊  
蕪為稱。漢屬太山郡。後漢范史雲為萊蕪長清儉  
守，郡百姓歌之曰：甌中生范史雲，釜中生魚范  
萊蕪，謂此邑也。故反蹤城。又按輿地志云：魏明  
帝景初三年，以遼東新沓縣吏民渡海來去，還於  
此地，置新沓縣以居之，屬齊郡。逢陵故城在縣  
四十里，左傳曰：齊大夫逢丑父與君易位為晉師。

所獲晉人捨之，齊頃公獲免。俗傳此即丑父之城。  
。淳于髡墓在縣東六十七里，史記曰：齊宣王好  
士淳于髡，談說之士七十餘人，並食上大夫祿。髡滑  
稽多智，時人號曰炙髡。髡死，諸弟子三千人為練。

經

長山縣

西北六十二里，舊本漢於陵縣地也。按漢於陵縣在今縣理南二十五里。

陵縣地也。按漢於

陵縣在今縣理南二十五里。於陵故城是也。自漢  
至晉，恒為於陵縣。地下改宋武帝於此，僑立廣川  
郡。又於郡理僑立武強縣。高齊天保七年，改廣川  
郡為平原郡。開皇三年，廢平原郡，乃移武強縣入

廢城中屬冀州十六年分置淄州復以武強屬焉  
十八年改武強為長山縣取今縣西南三十五里  
長白山為名屬淄州大業二年廢淄州縣隸齊州  
武德元年置鄒州縣又屬焉八年廢鄒州依舊屬  
淄州。長白山在縣西南四十里按顧野王輿地  
志云齊城西南百五十里有長白山陳仲子夫妻  
所隱處。濟水西自齊州章丘縣界流入在縣西  
北三十五里。縣理城即宋廣川郡理也。於陵  
故城在縣南二十五里漢於陵縣城也屬濟南郡  
水經注曰陳仲子齊國人兄祿萬鍾仲子非而不

食避兄離母家于於陵即此地也。高苑故城在  
縣北二十四里齊高苑縣也。濟南故城古郕城  
在今縣西北。十二斤溝郡國志云十二斤溝即  
百脉水亦曰合流水

高苑縣

北一百一十里舊  
十四鄉今二鄉

按漢地理志云高苑縣屬

千乘郡後漢屬樂安國宋無高苑縣別於今縣理  
西二皇如狄故城置樂長縣屬渤海高齊廢渤海  
郡改屬長樂郡隋開皇三年罷郡縣屬青州十六  
年隸淄州十八年改為會城縣大業三年改為高  
苑縣取縣東南高苑故城為名隋末陷賊唐武德

元年重置屬鄒州八年廢鄒州縣屬淄州按縣兼有漢千乘國地。濟水西南自鄒平縣界流入經縣北七十步。被陽故城在縣西南八十步本漢舊縣也侯國屬千乘郡高齊自如狄故城移長樂理於此。南千乘故城在縣北二十五里漢千乘郡高帝置領縣十五屬青州後漢和帝更名樂安國領縣九宋於此置樂安郡隋開皇三年移千乘縣於廣饒城屬青州今青州千乘縣理是也。廢濟陽縣唐景龍元年折高苑置以在濟水之北故名縣尋廢還高苑在州北九十四里也

鄒平縣

西北一百二十里  
舊十二鄉今四鄉

本漢舊縣屬濟南郡後漢

及晉並不改永嘉之後其縣遂廢後魏地屬臨濟縣按臨濟縣在今高苑縣界如狄故城是也高齊天保七年自今長山縣界濟南故城移平原縣於今理東南三十五里漢梁鄒故城地屬焉隸廣川郡周不改隋開皇三年自梁鄒城移平原縣入鄒平城屬齊州今理是也十六年改屬淄州十八年改平原縣為鄒平縣復漢舊名也大業二年罷淄川縣屬齊郡唐武德元年屬鄒州八年州廢隸屬譚州貞觀元年譚州廢隸淄州。黃河西北自齊



州臨濟縣界流入南去縣三十五里又北入高苑縣界。鄒平故縣城俗名趙臺城在縣西南十五里武德二年築置鄒平縣八年移於今理

### 齊州

齊州

濟南郡今理歷城縣

亦兗州之域星分危宿一度春秋

屬齊所謂晉平公伐齊戰於歷下因山以名地秦屬齊即漢韓信伐齊至歷下即此也文帝分齊郡立濟南國今州即濟南國之歷城縣理所景帝三年為濟南郡理東平陵屬青州晉永嘉末自東平陵城移於歷城今州是也後為石勒所據慕容氏

亦有其地義熙五年劉裕平之宋元嘉九年割青州西郡於此僑立冀州後魏改為齊州兼置濟南郡蓋齊之故地以為名隋開皇三年廢郡復為州煬帝初為齊郡唐武德元年改為齊州領歷城山荏祝阿源陽臨邑五縣二年置總管府管齊鄒東泰譚淄齊六州七年改總管府為都督府貞觀元年廢都督府及譚州仍有源陽縣又以廢譚州之年廢臨濟亭山章丘四縣來屬七年又置都督府管齊清淄萊密五州天寶元年改為臨淄郡五載改為濟南郡乾元二年復為齊州元和十五年平

盧奏所管五州共二十九縣內四縣戶口凋耗計其本縣稅錢自供官吏不足今請權宜併省豐齊山荏二縣入長清縣全節縣入歷城縣亭山縣入章丘縣

元領縣十

今六

歷城

臨邑

臨濟

章丘

禹城

長清

四縣廢

全節

豐齊

併歷城入長清

山荏

亭山

併長清入章丘

州境

東西二百七十五里

南北二百四十五里

四至八到

西南至東京九百里

西南至西京一千二百四十五里

西南至長安二千一百八十里

東至淄州二百里

正南微西至兗州三百三十四里

西渡河至博州二百九十七里

北至德州二百四十里

北渡河至棣州三百五十三里

東南至兗州四百四十五里

東南至鄆州二百四十里

西北至德州同上

東北至棣州二百四十里

戶

唐開元戶四萬九千一百五十七

皇朝戶五一萬二千八百三客一萬九千三百一

十五

風俗

同青州按十三州記云濟南教子倡優歌舞後

女死骨騰肉飛傾絕人目俗言齊倡蓋由此也

姓氏

濟陰郡四姓

苗

董

卞

邴

人物

前漢終軍

伏生

鄒陽齊人

後漢牟長

左思齊臨淄人作三都賦張華見而嘆曰班馬之

流也陸機欲作弁筆不能加也

唐房玄齡臨淄人

崔融全節人

何彥全節人

土產

綿 絹 絲 葛

今貢 防風 陽起石 壇石

歷城縣舊一鄉今二鄉古齊歷下城對歷山之下韓信渡河

破齊歷下之師即此也漢為歷城縣屬濟南國晉

隸濟南郡隋開皇三年罷郡屬齊州城東有故譚

國城焉。州理古歷下城史記晉平公伐齊戰于

歷下漢書酈食其說齊王田廣罷歷下軍韓信自

平原渡河襲歷下因入臨淄述征記歷城到營城

三十里自城以東水瀰漫數十里南則迫山寔為

險固。歷山在縣南五里水經注云歷山縣南山

上有舜祠下有泉穴。廟山在縣東南十里據晏

謨三齊記云縣東南山後人思舜之德置廟於此

。華不注山在縣東北十五里按春秋魯成公二

年魯季孫行父帥師會晉卻克及齊頃公戰于華

齊師敗績逐之三周華不注即此也水經注云華

不注山虎牙傑立孤峯特起青崖翠發望同點黛

又輿地志云一名金輿山。奎山在縣西南十五

里按三齊記云縣西有奎山公神似猪頭戴珠殷

時有道士在縣隱野火四發道士祈天即時降雨  
今人遇旱燒山乞雨多驗。歷水在縣東門外十  
步按三齊記云歷水在歷祠下泉源競發與灤水  
同入鵲山湖。孝感水在縣北門按三齊記云其  
水平地湧出為小渠與四望湖合流入州歷諸廨  
署西入灤水耆老相傳云昔有孝子事母取水遠  
感此泉湧出故名孝水天寶六年勅改為孝感水  
。灤水在縣西南二百步春秋桓十八年公會齊  
侯于灤杜預注云在齊州歷城縣西南水經注云  
俗謂為娥英水泉源有舜妃娥皇女英廟又謂之

羅姜祠。麻水。經注湖水引瀆上承東城歷下  
泉源競發其水北流經歷城東又北引水為流杯  
池。舜井在縣東一百步舜所穿之井也。華泉  
左氏傳逢丑父使齊頃公下如華泉取飲又續述  
征記云歷山有一古井無底與此泉通也。四望  
湖在縣西二百步其水分流入縣城至街中與孝  
感水合流入州城西出四泉合流。鮑城在縣東  
三十四里三齊記云鮑叔牙所食邑也。廢全節  
縣在故東平陵西北十五里春秋時譚國也齊桓  
公滅譚為齊地漢為東平陵縣地理志云即今縣

東南平陵城是也文帝十六年封齊悼惠王子辟光為濟南王平陵即此也宋省東字後魏又加東字至後周省隋末土人李蒲率鄉人據堡贍以家財唐武德二年蒲以城因子堡置譚州及平陵縣以蒲州為總管貞觀元年州廢縣屬齊州至十七年廢平陵章丘亭山歷城等縣又以都督齊王據州反土人李君求據縣不從縣人房綰伯等抗表聞奏太宗勅曰齊州平陵縣百姓爰自隋末以至於今常懷忠誠不從寇亂宜加優獎以旌義烈其縣可依舊置仍改以全節為名其後廢入歷城

○臺城在縣北一十三里按漢書平臺濟南縣也漢高祖封功臣戴野為臺侯又三齊記云高唐縣西南四十里有臺城其間空廢至魏孝昌三年馬日珎移郡入焉齊天寶七年改為濟南郡還入歷城縣其城廢○營城在縣西二十七里按漢書云本始元年趙充國以定策封營平侯濟南邑也又三齊記云歷城縣東四十里有營城又括地志云隋開皇十六年改置營城縣大業二年省唐武德二年置營城縣屬譚州八年省入平陵縣其城在平城○平陵城在縣東十五里按三齊記高唐縣

西南三十里有平陵城殷帝乙所都也東平陵縣屬濟南郡宋改為平陵縣十三郡志云本東陵後改為平陵。譚城在縣東南七十五里按春秋莊公十年齊師滅譚。子奔莒杜預注云譚國在濟南平陵西南水經注云武原水北迳譚城東又北迳平陵縣故城西故陵城也後乃加平譚國也。巨合城在縣東南三十三里水經注云巨合水南出雞山西北。經巨合故城西耿弇之討張步守巨里即此城也。  
禹城縣西北八十三里 一鄉今十一鄉 本春秋齊邑謂祝柯猶東

柯也古祝國黃帝之後按古東柯齊為柯漢為祝阿縣屬平原郡故城在今豐齊縣東北二里宋屬太原郡隋開皇十六年改屬齊州唐天寶元年改為禹城縣以縣西南三十里有廢禹息故城為名在今州西北八十五里乾元二年逆黨史思明侵河南守將李銑於長清縣界邊寮口決大河東至縣因而淪溺今理遷善村。漯水竹書穆天子傳曰丁卯天子東征釣於漯水以祭淑人已已天子東征食馬於漯水之上。野井亭即國志云齊侯唁公於野井。晏嬰城。內有井水合謬入藥方

○阿陽故城漢縣在廢禹城西北五十里阿陽故城是也後漢省其城隋開皇初有人于此城側掘古墓得名云阿縣令李君之墓。龍額在廢禹城縣東南二十五里有龍額城漢縣後漢省周宣王時祝阿縣魯理於此。濟河在縣西一百三十里從長清縣東北界分流入廢豐齊縣界。黃河在縣南七十里上從長清縣來東北入臨邑縣。古高唐城在縣南五十里春秋襄公十九年齊風沙衛奔高唐以叛杜預云高唐在祝阿縣西北此則古為齊邑也漢書地理云平原郡有高唐則漢縣

也即齊威王使盼子治高唐之地闕駟十三州記以為漢古縣在平原郡南五十里宋置高唐縣。瑗城在縣南一百里按春秋魯哀公十年晉趙鞅伐齊取犁及轅杜預云犁一名隰轅即瑗地濟南郡禹城縣西瑗地也漢書地理志云平原郡有瑗縣後改為東順縣此乃王莽之東順亭也。阿陽城在縣南七里地理志云平原郡有阿陽縣漢為侯國其城先屬平原縣漢魏已下却改為阿陽縣。高唐亭城在縣南一百里按魏時地理志云禹城有高唐亭括地志云禹古城在山莊縣北後魏



移於濟北此城是也。黃城在縣南一百里詩云  
衛懿公為狄人所滅東徙渡河野處曹邑春秋閔  
公二年冬及狄人戰于葵澤而敗宋桓公迎衛之  
遺民渡河立戴公齊桓公攘戎狄而封之就在河  
東即曹邑也。源陽城在縣南一百里隋末喪亂  
縣令桓孝才立墅於家側率宗親共守不屬諸賊  
唐德初大使崔同就築城奏授孝才為縣令城在  
源陽河側因以為名武德六年廢。廢禹城在縣  
南八十里乾元二年史思明作亂侵凌縣界義營  
防遏將軍李銑引師南奔遂決黃河水隔師因此

河水散流漂沒城邑百姓流散其城遂廢

臨邑縣

北五十里舊一鄉今五鄉

本漢舊縣屬東郡晉屬濟北國

宋武帝孝建二年立東魏郡理臺城以臨邑縣屬  
焉隋開皇三年罷郡縣屬齊州唐武德二年屬譚  
州貞觀元年譚州廢縣還齊州。隍陰縣漢縣今  
廢城在縣西十里一謂黎丘宋武帝平廣固遂移  
理於今臨邑縣西北五十里北隍陰城今縣有北  
故城漢城亦謂之南隍陰城。古黃河在縣南二  
十里上從禹城經縣下入臨濟縣界。蒼城在縣  
東南五十里古老相傳地生神蓍草每年貢四十

九莖

章丘縣

東北一百二十里  
舊二鄉今三鄉

本漢陽丘縣地屬濟南郡

按古高唐即春秋時齊邑在廢禹城縣西四十里  
高唐故城史記所謂齊威王使盼子守高唐趙人  
不敢東漁于河即此城是也高齊天寶七年移高  
唐於此即古黃中城也隋開皇十八年以博州亦  
有高唐縣改此為章丘縣因縣東南章丘為名唐  
武德二年屬譚州貞觀元年廢州以縣隸齊州。  
章丘爾雅曰上正曰章丘齊為邑即甯戚食邑於  
此。女郎山郡國志云山有祠焉齊記曰章侯有

三女溺死葬於此。長白山在縣東南三十里高  
十五里按晏謨齊記云於陵西三里有陳仲子夫  
妻隱處述征記曰長白山雲雨長白西南有大湖  
山並有石室而有漆船俗謂之堯時物。龍盤山  
在縣南二十八里按晏謨齊記云殷末周初有神  
龍潛於此山遂以為名兩縣中分南屬全郡北屬  
章丘上有神迹祠皇覽云是姜源所履處伏琛齊  
記宋濟南太守蕭承之立祠於山上承之妻亦學  
履產齊帝也。鷄山在縣西十里按晏謨齊記云  
衛國縣西有鷄山人云昔有神雞晨鳴於此有人

候之獲一石潔白如玉因以為名。百脉水在縣北十步濶三丈按晏謨齊記云源出亭山縣東界水源方百步百水之脉俱合流因以名西北入縣界屈曲六十里入濟。揚緒水一名獺河在縣東十里濶一丈按水經云揚緒水出逢陵故城西南二十里經土鼓城東又西北經章丘城又經寧戚城西北入於濟水。陽丘城在縣東南十里按前漢書地理志齊有陽丘縣文帝封齊悼惠王子安為陽丘侯今城南有陽丘故以名。寧戚城在縣東北三十里按酈元水經云揚緒水經寧戚城西

又漢孝武皇帝元朔三年封魯共王子恬為寧陽侯食濟南邑即此是也。樂盤山在縣南二十七里齊記云縣有樂盤城即平陵王與章丘侯餞送因名。東陵山在縣南二十八里盜跖死處陵南有盜跖墓高一丈。陽貨墓在縣西北一十里高一丈按春秋陽貨季氏家臣定公九年自魯奔齊晉逼趙不詳死所不知墓因在何處。平陵王墓在縣東北二里高三丈按漢文帝十六年封齊悼惠王子為齊孝王景帝三年孝王與吳楚反自殺葬於此墓在危山之頂。鄒衍墓在縣東一十里

高一丈。臨淄定公墓在縣西三十里高三丈在  
趙仙之陽公姓房隋故司隸刺史唐徐泗江淮浙  
五州刺史追封臨淄公謚曰定即故司空梁文父  
也有碑庶子安平公文率更令歐陽公書。廢亭  
山縣在州東南九十里漢平陵縣地宋元嘉五年  
於此置衛國縣屬頓丘郡隋開皇六年改為亭山  
縣屬齊州唐元和十五年以戶口凋殘併入章丘  
長清縣東南八十里舊  
管一鄉今三鄉本漢盧縣地後魏孝明帝孝  
昌二年自山荏故城移東太原郡於此隋開皇五  
年於此置鎮十四年廢置長清縣屬齊州因清水

以為名六年割隸濟州唐貞觀十七年廢濟州以  
縣入齊州元和十五年併山荏縣入焉。清水去  
縣西南十里西南自平陰縣界流入注水經云盟  
津河別流十里與清水合謂此也。石窰在盧城  
之東去縣三十里左氏傳齊晉戰于鞍齊師敗績  
齊侯自徐闕入見女子曰君免乎曰免銳司徒免  
乎曰免既而問之銳司徒之女辟司徒之妻齊侯  
以其有礼賜之石窰也。黃河北去縣五十里。  
濟水北去縣八十里其山頂上有長城北屬長清  
縣南接魯郡。隔馬山在縣東南三十里按春秋

魯襄公十八年晉師伐齊。侯禦諸子陰塹防門而守之。廣里齊師懼夜遁于夙沙。衛連大車以塞隧而殿。殖綽郭最曰：子殿國師齊之辱也。子姑先乎。乃代之殿。衛怨二子遂殺馬於隘以塞道。欲使晉師得之。即此後人呼為隔馬山。四口關在縣西南五十里。後魏置唐武德九年廢。涓溝伯在縣西南五十里。東西三十里。南北二十五里。水族於此生。數州人取給。廢在縣在縣東四十里。漢之舊縣也。屬太山郡。隋廢唐武德九年復置。在州西三十六里。又魏志黃龍見於此。在即漢之在縣。

也。天寶元年八月改為豐齊縣。元和十五年廢入長清縣。壬水東南自歷城縣流入。祝柯縣故城在縣東北四十五里。按春秋魯襄公十九年春正月諸侯同盟于祝柯。即此也。盧城在縣南五十里。內有隔城。春秋魯隱公三年冬齊鄭盟于石門。尋盧之盟。社氏云盧盟在春秋前。莫知年代。盧即齊地。今濟北盧縣故城是也。故濟北縣城在縣西三十里者。舊相傳云移於今縣。改為長濟。廢豐齊縣城在縣東北四十里。唐憲宗元和十五年隸入當陽縣。燕昭王墓在縣南一十五里。按

史記六國年表云燕昭王三十年卒時不言葬處  
今稱墓於此又按春秋後語云燕昭王使樂毅伐  
齊下七十城唯即墨與莒未拔齊用田單計敗燕  
恐是燕軍之墓後人誤傳也。趙盾墓在縣東北  
六十五里按趙世家云盾景公五年薨謚曰宣葬  
於此。班超墓在縣東北二十五里按後漢列傳  
班超字仲升本平陵人也立功西域封定遠侯居  
邊塞三十一歲因其妹上書願生入玉門關乃得  
還卒葬此

臨濟縣

東北一百二十里  
舊管二鄉今二鄉

本漢管縣地屬濟南郡按

晉太康地志云管叔後又封于此城齊滅管故其  
子孫仕齊唐武德元年於此立鄒州後廢州為臨  
濟縣。朝陽城漢縣名也應劭云在朝水之陽今  
縣東四十里。故樂安城在縣東北八十里漢書  
地理志注云更千乘郡為樂安國即此是也。馬  
融冢在縣南一里一百七十步融為郡太守卒葬  
於此。鄺商冢在縣西南一百七十步又云是終  
軍冢也。赫胥氏墓在縣東故朝陽城內一里。  
伏生冢在縣朝陽城東五里按尚書序濟南伏生  
按地理志濟南郡此是也

太平寰宇記卷第十九

校勘

淄州 總序

在漢為濟南郡之般陽縣屬濟南樂安二國尋  
又置臨淄國於此

按般陽前漢屬濟南郡後漢屬齊國今但  
以般陽一縣言之則當為漢云濟南郡之  
般陽後漢屬齊國其曰屬濟南樂安二國  
者誤也若概州境而言則今之淄川兼有  
漢濟南之般陽泰山之萊蕪之地今之高  
苑兼有前漢千乘郡後漢樂安國之地又

不當云屬濟南樂安二國也又云置臨淄國於此兩漢無臨淄國但齊故都臨淄耳今當云又置齊國於此

長山縣

舊十八鄉今十九鄉

按別本舊十鄉今五鄉未知孰是

齊州

長清縣

湄溝伯

按元和郡縣志作湄溝伯未知孰是

太平寰宇記卷第二十

河南道二十

登州

萊州

登州

登州

文登郡今禹貢青州之域古萊于之國春秋齊侯滅

萊至漢為東萊郡漢武帝封齊孝王子濞為牟平侯此

即濞之邑也按牟平在今蓬萊縣東南九十里牟平故

城是也後魏武定元年分東萊縣於黃縣東一百步中

即故城置東牟郡高齊天保七年廢東牟郡自今昌陽



縣東五十三里長廣故城移長廣郡理中郎城隋開皇三年改為牟州大業三年為郡廢州唐武德四年又置州後因文登縣人不從賊黨遂於縣里置登州貞觀元年牟州及牟平縣登州俱廢麟德二年析文登縣地於東牟故城置牟平縣如意元年又於牟平縣置登州領文登牟平黃三縣神龍三年自牟平徙登州於蓬萊鎮南一里析黃縣置蓬萊縣於州理即今登州所理也天寶元年為東牟郡乾元元年復為登州

元領縣四

蓬萊

文登

黃縣

牟平

州境

東西四百九十五里

南北一百六十三里

四至八到

西南至東京一千九百五十里

西南至西京二千三百七十里

西南至長安三千里

東至文登縣界大海四百九十里

南至萊州昌陽縣二百一十里

南至大海四里當中國往新羅渤海大路

北至大海三里

東南至海州四百六十里

西南至萊州四百里

正北微東至海北岫都里鎮五百三十里

戶

唐開元戶二萬二百九十八

皇朝戶主一萬五千四百五十六客一萬七千四百五

十八

風俗

同青州

人物無

土產

文蛤

牛黃

已上舊貢

水葱席

今貢

紗布

蓬萊縣

依舊五鄉

本漢黃縣地屬東萊郡昔漢武帝於此望海

中蓬萊山因築城以為名在黃縣東北五十里唐貞觀

八年於此置蓬萊鎮神龍三年析黃縣置蓬萊縣在鎮

南一里即今登州所理是也○羽山在縣南十五里尚

書云殛鯀于羽山孔安國注云其山在東齊海中即此

也○九目山在縣東南七十里按晏謨齊記云山有竅

因名九目○沙門島在縣北海中五十里○之罘水在

縣南一十五里源出羽山與石門水合流入海○鯨城

在縣南六十里古老相傳云是魏將田預領兵禦吳將周賀築之蓋近殛鯨之地因名。烏湖戍在縣北海中二百六十五里置烏湖島上唐太宗貞觀二十年為伐東夷當要路遂置為鎮至永徽元年廢。大謝戍在縣北海中三十里周迴一百二十二步亦唐太宗征高麗時與烏湖戍同時置。鹹泉池其泉鹹百姓取之為鹽。○牟平故城漢為縣理于此在縣東南九十里故城是也高齊天保七年移于今黃縣東七十三里。馬嶺山南置隋廢唐武德三年又置貞觀元年又廢

文登縣

東南二百八十里  
舊十二鄉今五鄉

本漢牟平縣地按漢牟平縣在

今黃縣東一百三十里牟平故城是也本屬東萊郡自漢迄魏皆為牟平縣地高齊後主天統四年分牟平置文登縣屬長廣郡取縣界文登山為名隋開皇三年廢長廣郡文登縣屬萊州唐武德四年于此置登州領文登觀陽二縣六年以觀陽屬牟州又置清陽廓定二縣屬登州貞觀元年廢登州又廢清陽廓定二縣入文登縣神龍三年徙登州于蓬萊鎮文登縣又隸焉。之罘山在縣西北百九十里史記曰秦始皇二十九年登之罘刊石紀功三十七年又自琅琊使徐福採藥福言常苦大魚為患于是連舟下海登之罘山射巨魚還自平

原郊祀志曰齊有八祠之朶山為陽主武帝太始三年  
幸琅邪禮日成山登之朶山稱萬歲子虛賦曰射乎之  
朶是也其山在海中山東南海水中有壘石俗傳云武  
帝造橋有兩石銘仍存山高九里周迴五十里○召石  
山在縣東八十五里三齊畧記云秦始皇造石橋渡海  
觀日出處有神人召石下城陽一十三山石遣東下岌  
岌相隨如行壯狀石去不駛神人鞭之皆見血今驗召  
石山之色其下石色盡赤馬○鐵官山在縣西百四十  
里按此山去年平城百里銅鐵之處猶存漢置鐵官○  
石橋海神在縣南六十里縣北百里縣東百八十里三

面俱至于海縣東北海中有秦始皇石橋伏琛齊記云  
始皇造橋欲渡海觀日出處海神為驅石豎柱始皇感  
其惠通教于神求與相見神曰我醜莫圖我形當與帝  
會始皇造石橋渡海四十里與神相見帝左右有巧者  
潛以足畫神形神怒曰帝負約可速去始皇轉馬之前  
脚獨立後脚隨 僅得登岸今驗成山東入海道可廣  
二十步時有豎石柱 相望似橋柱狀海中又有石橋  
柱二所乍出乍沒俗云漢武帝所作也○東牟故城在  
縣西北一十里漢東牟縣地也屬東萊郡有鐵官監官  
高后六年封齊悼惠王子興居為侯至宋省○道路西

北自黃縣界更經烏趣石阜二山之間又東京縣理東  
達於海東諸國朝貢必由此道。○文登山在縣東二  
里古老相傳秦始皇東巡召集文人登此山論功頌德  
因名。○鵠鷓山在縣東南二十里此山常有鵠鷓栖止  
○石門山在縣東南八十里山有二石聳立高二丈東  
西相去一丈望之如門。○五壘山在縣南五十里其山  
南北成形入海如壘焉。○白鹿山在縣北四十里唐神  
龍三年白鹿復見刺史畢元愷入進。○雞鳴島在縣東  
北一百三十里晏謨齊記云不夜城北有雞鳴島。○昌  
陽縣在縣西南四十里周迴十二步南流入黑水此縣

都有溫湯七所。○秦宮在縣東北一百八十里古老相  
傳云秦始皇所造東南兩面臨海南有七井水。○望海  
臺在縣東北一百八十里古老相傳云秦始皇在成山  
壘石造此臺望海伏琛齊記云始皇欲渡海立此石標  
之為記。○成山史記秦始皇二十八年行郡縣上太山  
乃並渤海以東過黃窮成山郊祀志齊有八祠成山  
為日主。○斥山爾雅東北之美有斥山之文皮馬。○昌  
山按宋永初山川記云昌陽縣有昌水郡國記云昌陽  
縣有巨神島有祠能興雲雨崔琰避黃巾賊於此山。○  
不夜城即春秋時萊子所置邑以日出於東故以不夜

為名漢縣屬東萊在今縣東北八十里有不夜故城有  
成山祠莽曰夙夜後漢省併昌陽故城東北五十一里  
有雞鳴島即海也。育犁漢立縣後漢省併入牟平蓋  
在金東南一百二十里湫港水側近以地良沃故以  
育犁名邑。睡音漢縣省併入牟平按漢志注云東萊  
隄縣有之罘山祠并丹水所出東北入海是也蓋在今  
縣西七十里清陽水側近與海畔之罘山相對。海牛  
島郡國志云不夜城北有海牛島無角紫色足似龜長  
犬餘尾若鮎魚性捷疾見人則飛赴水皮堪弓韃脂可  
燃燈。海驢島上多海驢常以八月九月於此島乳

產皮毛可長二分其皮水不能潤可以禦雨時有獲者

可貴

黃縣

西南五十三里古萊子國都於此漢縣屬東萊郡

莽曰意母故城在今縣東南二十五里故黃城是也高

齊天寶七年移于今理唐武德四年屬牟州神龍三年

置登州黃縣割屬焉按漢屬曰秦欲伐匈奴運糧使天

下飛芻輓粟起于黃腫琅邪負海之郡輸北河率三十

鍾而致一石黃即今黃縣腫即今文登縣漢並屬東萊

即北河朔方已北六斛四斗曰鍾計道路所費凡用百

九十二斛乃致一石。故黃城在縣東南二十五里古

萊子之國春秋傳云齊侯滅萊杜預注云今東萊黃縣是也。○大入故城在縣東北二十里司馬宣王伐遼東造此城運糧船從此入今新羅百濟往還常由於此。○蓬萊鎮在縣東北五十里。○海瀆祠在縣北二十四里大入城上。○萊山封禪書云齊之八祠萊山為月一云萊陰山多仙聖所居。○九日山連接縣界。○蹲狗山在縣西南三十里山上有石如蹲狗伏氏記云山極靈劉寵徵時途由此石犬吠之後為太尉。○大海在縣北三里又縣西至海四里當中國往新羅渤海大路由此。○故徐鄉城漢縣成帝封膠東共王子快為侯後漢省

其地即今邑界已失其故城遺址。○愜漢縣在縣西南二十五里有愜故城存即高齊天保七年省入黃。○中即城即國志云石勒遣中即將石同築此城以防海故曰中即城。○士鄉城後漢書云齊有士鄉越有君子里謂此

牟平縣東二百里舊本漢縣也屬東萊郡有秩官監官王子侯表曰齊孝王子濞為牟平侯後漢屬郡不改晉屬東萊國在牟山之陽其地夷坦故曰牟平高齊天保七年自牟平故城移縣于今黃縣東北七十三里改屬長廣郡隋開皇三年改長廣郡為牟州牟平縣仍屬焉大

業二年廢牟州為萊州唐武德四年又于中郎城置牟  
州牟平縣屬焉貞觀元年州縣俱廢麟德二年析文登  
縣于此重置牟平縣屬登州○廬山在縣東十八里北  
與東牟縣峴山相連峴山上正北至海一百里有望海  
臺○峴山在縣東北二十里與廬山相連上有東牟侯  
祠按晏謨齊記云廬山東北有東牟大峴山○繫馬山  
在縣東四十里古老相傳秦始皇遊此山攬草繫馬至  
今山中草春生並皆垂屈若人繫結之狀俗云繫馬砮  
○大崑崙山在縣東南四十里按仙經云姑餘山因麻  
姑曾於此山脩道上升有餘址尚在因以為名後代以

姑餘崑崙山聲相類而倍名又有小崑崙相連○兩款  
山在縣西南六十里其山兩峯欹側相背為名

萊州

萊州東萊郡今禹貢青州之域禹貢曰嵎夷既畧萊夷作  
理掖縣

牧注曰嵎夷地名用功少曰略萊夷可放牧也即萊子  
之國也左傳曰齊侯伐萊○人使正輿子賂夙沙衛以  
索馬牛皆百足齊師乃還後齊復入萊共公浮柔奔棠  
晏弱圖棠滅之遷萊于 在國之東故曰東萊按古萊  
子國在今黃縣東南二十里黃城是也周之九州又為  
幽州之境職方氏幽州其澤藪曰獫狁養按獫狁澤在今



昌陽縣界史記周武王封太公於營丘萊侯聞之遂與  
太公爭營丘然則萊為殷時諸侯也秦置三十六郡為  
齊郡漢高帝四年韓信虜齊王廣分齊郡因置東萊郡  
領縣十七里掖縣屬青州後漢移理黃縣魏不改晉武  
帝太康四年徙遼東王蕤為東萊王郡復理掖宋時郡  
改理曲城後魏初亦然及皇興四年分青州置光州取  
界內光水為名領東萊郡州與郡同理掖縣高齊及後  
周不改隋文帝罷郡仍改光州為萊州煬帝二年罷州  
復為東萊郡唐武德初改為萊州天寶元年改為東萊  
郡乾元元年復為萊州

元領縣四

掖縣

萊陽

即墨

膠水

州境

東西一百二十里

南北二百四十五里

四至八到

西南至東京一千五百里

西南至西京一千九百里

西南至長安二千七百六十里

東至登州四百里 東北至登州 同上

南至青州三百四十五里

正南微西至密州三百六十里  
西至大海二十九里  
北至海五十里  
東南至海二百五十里  
西南至青州界一百二十九里  
西北至海二十一里

戶

唐開元戶二萬六千九百九十  
皇朝戶主一萬五千五百二十三客一萬六千五百八

風俗

土疎水濶山高海深人性剛強志氣緩慢語毅上形容  
大此水土之風也

人物

李忠字仲都東萊黃人光武以為右大將軍  
劉寵東萊牟平人遷會稽太守有善政  
劉岱字公山弟繇字仲禮所謂騁騏驎於千里  
太史慈東萊人北海相孔融敬之

土產

牡蠣 決明 海藻 綿 絹 麻布 茯苓 牛黃  
文蛤 貝 石器 貢

掖縣

日十四鄉  
今五鄉

本漢舊縣也屬東萊郡按掖水出縣東南

三十里寒同山故縣取為名後屬郡不改晉屬東萊國

宋屬東萊郡隋開皇三年罷郡屬萊州○望海臺秦始皇

皇所造○沙丘城紂所築始皇崩處○膠東庸生宅在

縣界○墜星石在縣東北七十里○海水在縣北五十

二里水經注曰平度故縣有土山北眺巨海杳冥無際

○輪井在縣東北十里石穴下洞於泉口如車輪無雕

琢之迹自然而成故號天井能興雲雨人多祈祭○海

神祠在縣西北十七里地理志云東萊郡有海神祠謂

此也○掖水在縣東南二十五里源出崗掖山○膠水

在縣西南七十五里北流經土山西注於海○三山在縣

北五十里海之南岸史記封禪書云八祠在三山為陰

主其祠見在此山○萬里沙漠書却祀志云武帝元封

元年大旱禱萬里沙又封禪書云天子既出禱萬里沙

還祀太山按沙長三百里據史記注云在漢縣東北三十

里夾萬歲水兩岸是也○成山武帝太始三年幸東海

作朱雁之歌拜日於成山還而下恤鰥寡又齊記云成

山有牛島常以五月有海狸上島產乳逢人則化魚入

水○當利故城漢志注云有監官在今萊州西南三十

六里有當利故城高齊天寶七年廢○曲城故城漢縣

廢城在今縣東北六十里晉改為曲城大業二年廢武  
德四年復六年又廢。轉鮒左思齊都賦曰轉鮒朝舞  
竒現所說又按晏子春秋景公謂曰吾欲遊轉附朝舞  
循海而南是也。燕臺在縣東北二里南燕慕容德以  
東萊掖城為青州理所築。故臨朐城漢故城在郡北  
二十三里臨朐故城是也。後漢省郡國縣道記云臨朐  
有海水祠今故城北去海二十里南去海神祠約五六  
里與漢志注同。陽樂漢縣後漢省併當利按十三州  
志云在當利縣東北二十里蓋在今萊州西南二十里  
內是其地。故陽石縣漢成帝封膠東共王子慶為陵

石侯後漢省併當利又十三州志云當利縣東有陵石  
城陵為陽字之誤蓋在今縣南當利故城東即其地也  
○盤石在縣北五十七里北臨大海有一盤石方圓五  
步上有窪搏狀若盞石古老相傳云秦始皇於此鑿盤  
以盛酒醢祈祭有神

萊陽縣 西南一百八十里  
日十三鄉今五鄉 本漢昌陽縣屬東萊郡置在昌  
水之陽故名昌陽有監官後漢屬郡不改晉無昌陽縣  
按此前昌陽縣理在文登縣西南三十里昌陽故城是  
也顧野王曰晉惠帝元康八年復立昌陽縣屬長廣郡  
今理是也宋及後高齊魏同文宣天保七年廢長廣郡復以

昌陽縣屬東萊郡隋開皇三年罷郡昌陽縣屬萊州按  
今縣兼有漢長廣挺縣現陽鄒盧四縣之地後唐莊宗  
同光元年避國諱改為萊陽縣。黃銀坑在縣東一百  
四十里隋開皇十八年牟州刺史辛公義於此坑冶禱  
得黃銀獻之大業末絕唐貞觀初更沙汰得之。七子  
山在縣東南九十三里山有八峯大峯居中七山在側  
倍謂之七子山若大峯之子也。五龍山在縣南二十  
里有水五道於山下合流穿入於南海俗以五龍為名  
。韭山在縣南二十里周迴三里多藿菜爾雅云藿山  
韭也。高麗山在縣西南九十里魏司馬懿討遼東於

此置戍以高麗為名。火山在縣北三十六里高一里  
山多赤石其色如火因以為名。廢萊陽城在縣東南  
二十三里隋大業中築屬東萊郡唐永徽元年水淹破  
。挺城在縣 七里漢書地理志挺城屬膠東國後  
隸入東萊郡。奚養澤漢地理志云長廣縣西有奚養  
澤周禮職方幽州之澤藪曰奚養。故長廣城亦漢縣  
屬琅邪郡後漢改為東萊郡高齊天保七年因長廣郡  
自膠東城入中郎城復移長廣縣於膠東城此城遂廢  
故城在今縣東五十里有萊王山祠奚養澤在西也  
即墨縣 東南二百三十里 漢舊縣屬膠東國城臨墨水故  
日八鄉今二鄉

曰即墨在今膠水縣東六十里田單敗燕兵之處隋文帝開皇十六年於古不期城東北二十七里置今縣所理城復古即墨為名隸萊州史記蘇秦云東有琅邪即墨之饒也。天井山在縣東十三里周迴二里頂上有一井水味甘美因號天井。陰山在縣東南八十里上有石池深三寸旱不減雨不漲冬夏清澈曾無滓穢池東石有馬蹄迹又有五石人廣數圍高一丈古老相傳云秦始皇幸琅瑯因至牢盛山望蓬萊蓋立馬於此又遣石人驅牢山不得遂立於此石人諸山往來有之。中祠山在縣東南五里漢書云不期山有太一仙人祠

九所此即一也。不期山在縣東南四十五里三齊記云鄭玄教授於不期山下生草大如籬葉長一尺餘堅必異常土人名曰康成書帶。女姑山在縣西南三十里其山北舊有墓基古老傳云此為明堂漢地理志不期太一仙人祠九所及明堂武帝所起不期城西南有七神號曰女姑即此是也。臯虞故城在縣東北五十里漢書元封元年封膠東康王子建為臯虞侯子孫相承六代王莽篡位改為盈廬。田橫島在縣東北百餘里橫之衆五百餘人俱死於此島四面環海去岸二十五里可居千餘處。天室山漢書云即墨縣有天石山

祠。○大勞山小勞山郡國志云吳王夫差登之得靈寶  
度人經齊記云太山自言高不如東山勞昔鄭康成領  
徒於此神仙傳云樂子長好道遇仙人受以巨勝赤散  
方仙人曰蛇服此藥化為龍人服此藥老成童子長服  
之年百八十色如少女入海登大勞山仙去山高十五  
里周八里在縣東南三十八里。○海在縣東四十三里  
又在縣南百里。○溫湯在縣東北三十里平地湧出有  
三穴焉風若西北來湯極熱不可入。○壯武故城在縣  
西六十里古夷國漢壯武縣也晉封張華為壯武侯至  
宋省。○沽水左氏云聊攝以東姑尤已西其為人也多

矣姑尤即齊界也。○不期城漢縣屬琅邪在縣西南三  
十七里古城是也今約周十餘里後漢改屬東萊郡晉  
於此置長廣郡高齊天保七年省地理志有太一仙人  
祠九所及明堂皆武帝所起亦因山為名。○古冢郡國  
志云即墨城北有古冢或發之有黃牛從埏門出犯之  
即吼不可動也。○夏侯鼻墓郡國志云昔徐誕弟子夏  
侯鼻死後有人遇鼻以手中寄信與誕。○視之乃棺中  
物也

膠水縣東八十里舊本漢膠東國之地按漢膠東國在今  
八鄉今三鄉縣東南六十里即墨故城是也後漢省膠東國為縣屬

北海國後魏屬北海郡高齊及周不改開皇三年罷郡  
屬萊州仁壽元年改為膠水縣取縣西膠水為名。○即  
墨故城在縣東南六十里古東齊之地史記蘇秦曰齊  
有琅邪即墨之饒此其處也齊威王召即墨大夫語之  
曰自子之君即墨也毀言日至然吾使人視即墨田野  
闢民人給官無留事東方以寧是子不事吾左右以求  
譽也湣王時燕得樂毅伐齊下七十餘城惟莒即墨不  
下田單東保即墨六年田單設奇策破燕軍迎襄王於  
莒盡復齊地封單為安平君漢書漢元年項羽徙齊王  
田布于即墨為膠東王田榮怒殺布於即墨自立為王

遂併三齊之地漢膠東郡領八縣理即墨此其城也。○  
故平度城漢縣在今縣西北六十七里平度故城後漢  
省有膠水經故城又北流入大海。○蘆鄉故城漢縣故  
城在今縣西北五十里高齊天保七年省併入膠東。○  
大谿山在縣西北二十里按伏琛齊記云蘆鄉城東南  
有谿口故曰大谿口即此也又有小谿山相連。○嶺岬  
山在縣北三十里其山形勢峭岬為名。○明堂山在縣  
東北四十八里齊記云蘆鄉城東三十里有明堂山與  
巨青山連出烏頭天雄。○墨山在縣東北六十里石色  
如墨又有墨水出焉。○金泉山在縣東南四十里其山



出桔梗及防風。○藥石水在縣西北五十里。源出明堂山。合石瀆河。○膠水在縣西八十里。源出密州諸城縣東嶗山。按山海經云：膠水縣東有故縣，有膠水出焉。西流經掖縣入海。○定渚渠在縣南七十里。西流入膠水。漢書武帝征和四年正月，行幸東萊臨大海，三月上耕于鉅定，即此。○樂毅城在即墨城北。史記樂毅攻田單，築此城。○甯戚冢在縣西六十里。齊記云：東亭西亭西北七十里有甯戚冢，因山為塚，俗呼為鳴角阜仙人臺。在縣東北五十里。青山下列仙傳：膠東公沙宿飲白雀泉，得仙常遊石臺之上，即此也。其臺四絕，今不可登陟。

校勘

萊州

掖縣

掖水

按縣志序載掖水所出及道理與掖水條下所載不同，未詳其說。

太平寰宇記卷第二十一

河南道二十一

兗州

萊蕪監

兗州

兗州

魯郡今瑕丘縣

禹貢兗州之域星分奎婁自奎五度至胃

六度於辰在戌曆奎婁胃為魯之分野春秋時為魯國

史記武王即位封周公子伯禽於曲阜為魯公六國時

屬楚秦滅楚屬秦以魯為薛郡漢高祖更立魯國以

封公主又立泰山山陽二郡後漢改為任城國以泰山

山陽郡地兼置兖州晉改為魯郡宋武帝平河南兖州  
治滑臺文帝元嘉十三年治鄒山又寄治彭城二十年  
省兖州三十年立兖州三十年立兖州于瑕丘後魏宣  
武正始年又置南兖州於譙城孝明孝昌二年又置西  
兖州於定陶城北齊為任城郡隋大業二年改為魯郡  
唐武德五年平徐圓朗置兖州領任城瑕丘平陸龔丘  
曲阜鄒泗水七縣貞觀元年省曲阜其年又省東泰州  
以博城縣來屬八年復置曲阜十四年置都督府管充  
泰沂三州十七年以廢戴州之金鄉方輿來屬長安四  
年置萊蕪縣天寶元年改為魯郡乾元二年復為兖州

自唐末至漢並為泰寧軍節度周廣順二年降為防禦  
州以慕容彥超叛命仍平故也。皇朝復為泰寧軍節  
度

元領縣十

今七

瑕丘

曲阜

鄒縣

萊蕪

龔丘

乾封

泗水

三縣割出

任城

入濟州境

金鄉

入濟州

魚臺

入阜州

東西一百七十里

南北三百一十九里

四至八到

西南至東京六百里

西南至西京一千里

西南至長安二千里

東至沂州三百八十五里

南至徐州三百九十六里

西至濟州一百五十里

北至齊州三百三十里

西南至徐州三百四十里

東北至淄州三百七十里

西北至鄆州一百八十里

戶

唐開元戶六萬七千三百九十七

皇朝管戶主一萬二百一十一客八千四十八

風俗

漢書云周封周公子伯禽為魯侯有聖人之教化故孔子曰齊一變至于魯魯一變至於道言近正也俗既益薄孔子憫王道將廢乃脩六經以述三代之道是以其人好學尚禮義重廉恥周公遺化銷微庠序衰壞地狹人衆頗有桑麻之業無林澤之饒其俗儉嗇愛財趨商

賈好訾毀多巧偽其喪葬之禮文備寔寡然而好學猶愈於他俗貨殖傳云魯人俗儉嗇而丙氏尤甚富至鉅萬鄒魯以其故多去文學而趨利

姓氏

魯國郡七姓 夏 孔 唐 車

顏 栗 宰

山陽郡三姓 鞏 却 蹇

郡五姓 胡 周 羊

曹 孫

平昌郡三姓 管 孟 牟

郡五姓 邵 隸 徐

史 錢

人物

春秋有臧僖伯 臧文仲 展禽 梓慎 仲

孔丘 顏回 孟軻

前漢孔光 邴吉 史丹

帝賢孟之後

朱雲

後漢王龔 檀敷 魏應 羊續

范式字巨卿山陽金鄉人陳平子病謂妻曰吾聞山陽

范巨卿烈士也可以託死 劉表山陽高平人魯恭

王之後 高隆堂 王燦

晉有羊祐 却隆 唐彬 却鑿 魏舒

宋有羊欣 孔淳之 齊有檀起

後魏有羊敦 已上並魯人

梁羊侃泰山梁父人挽弓二十石為侍中

唐有徐洪字彥伯兖州瑕丘人

却士美高平金鄉人與顏真卿討論應對如流

土產

禹貢漆絲織文 汶陽之篠可以為笙

金貢鏡 蒼綾 絹 綿 防風 紫石英 茯苓

瑕丘縣 舊十四鄉 春秋謂以却子益來因諸負瑕杜注云

魯邑也高平郡舊縣西北有瑕丘城漢立縣屬山縣郡

金隸兖州。洙水東北去縣二十二里。泗水東自曲

阜縣界流入合洙水。淮安王神通營在瑕丘城中唐

武德五年平賊徐圓朗屯兵之處。堯祠在縣東南七

里洙水之西。杏壇鄉同夫子杏壇為名。樊縣故城

漢縣廢城在今縣西南按郡國志云卿士樊仲皮國也

曲阜縣 東三十里舊 春秋之魯國伯禽所都其地方炎帝

之墟按郡國志云神農氏自陳徙都於此昔大庭坡故

有大庭之庫存焉漢為魯縣魏為曲阜委曲長七八里  
故曰曲阜。防山在縣東二十五里高二里坊禮記孔  
子母合葬於防史記有云孔子父叔梁紇死葬於防在  
魯城東。女陵山在縣北二十六里相傳云秦始皇東  
巡女死葬於此山因名今山頂墳陵俱存其山多美石  
。九山在縣北三十里其山有九峯因以為名。嶮水  
在縣北四十二里源出九山東南流入洙水其磯澗嶮  
隘左氏經云桓十二年公會杞侯莒子盟于曲池注云  
魯國汶陽縣北曲水亭今其水常流不絕地理志漢舊  
縣也王莽改曰汶亭。達泉溝在縣東南十里源出縣

東南平澤西南流合沙溝共流數里同入於沂左傳莊  
三十二年僖叔飲醕歸及達泉一名連泉。靈光殿高  
一丈在魯城內縣西南二里魯恭王餘之所立。古魯  
城春秋之時魯國都也其城凡有十二門東有二門其  
北名上東門今名始明門按左傳定公八年公歛處父  
帥邠人自上東門入注云魯東城之北門也又國語臧  
文仲祭爰居於魯東門之外皆此門也。古魯城門魯  
城伯禽邑也西五門第一曰鹿門即臧孫紇斬鹿門閤  
以出第三曰稷門即圍人榮能投蓋於稷門按魯國記  
云古城凡有七門東西有三門最北者名萊門左傳哀

公六年公子陽生請于南郭且于乘出萊門而告之故  
注云魯郭門也次南第二門名石門按論語云子路宿  
於石門注云魯城外門呂氏春秋云宋有桐門右師魯  
有石門歸父即此門也南面有一門不詳其名北面有  
三門最西者名子駒門按左傳文公十一年獲長狄僑  
如埋其首于子駒之門註云子駒魯郭門次東二門無  
名○闕里在縣西南三里魯城中北出洙水百餘步○  
洙泗二水在縣北五里泗水東自泗水縣流入在縣與  
洙水並流南為泗水北為洙水二水之間即夫子所居  
也孔子家在故魯城中歸德門內闕里之中背洙面泗

矍相圃之東北也後漢明帝東巡狩幸焉○古洙城無  
濠塹在縣東四十里邾魯之附庸國左傳哀公七年  
魯擊柝聞於邾注云言近也邾人於此築小城以備魯  
故名邾城○古汶陽城在縣東北四十里左傳桓公十  
二年盟于曲池注云魯國汶陽縣北有曲水亭又輿地  
志漢舊縣王莽改曰汶亭○雩門左傳謂公子偃曰宋  
師不整可敗也自雩門竊出蒙臯比而先犯之大敗宋  
師于乘丘即此門○泮宮二池在縣南二里泮宮臺南  
按詩魯頌二僖公云思樂泮水薄采其芹魯侯戾止在  
泮飲酒○奄中續漢書郡國志曰古奄國史記云汶郭



出魯奄中張茂先云即魯之奄里。窮桑郡國志云少昊自窮桑登帝位按窮桑在魯國之北後徙曲阜顓頊亦自窮桑徙帝丘又千寶云徵在生孔子於空桑之地今名孔竇在魯南山之穴。伯禽墓高四丈四尺在縣七里按左傳定公四年成王同商奄之民命以伯禽西封於少皞之墟注云少皞墟在魯城內書序云魯侯伯禽宅曲阜是也。魯文公冢高五丈五尺在縣南九里冢北有石人四獸二。魯共王墓高一丈在縣南九里漢書云共王餘景帝程姬之子封之於魯謚曰共王。孔子墓高一丈二尺在縣西北三里史記云孔子葬

魯城北泗上弟子三年心喪畢相訣而去惟子貢廬于冢上凡六年弟子及魯人從冢而冢者百有餘室因命曰孔里皇覽冢墓記云孔子冢瑩百畝本無祠堂瑩中樹以百數皆異種魯人世無能名其樹者民傳言孔子弟子異國人各特其方樹來種之瑩中不生荆棘及刺人草今惟有柞樹成林更無異木論衡云孔子當泗水而葬之水為之却流。伯魚墓在孔子墓東一十步。顏回墓子思墓俱在縣東二十里方山下。孟軻墓在縣南四十里元屬鄒縣界唐貞觀八年大使杜正倫置曲阜縣隸入曲阜。顏叔子墓在縣東南三十五里

亦名清陵墳。○三良冢。郡國志即二挑殺者良父。吟曰問是誰家冢。田疆古冶子。○陳博達墓在縣西北二十里。前有石獸四。石碑一。云齊郡刺史武平五年立。○宰我墓在縣西南二十里。郡國志云宰我魯人為臨淄大夫。與田常作亂。夷其族。孔子耻之。○莊公墓在魯城內。縣西北二里。按左傳莊三十二年築臺。臨黨氏見孟任。即此臺也。○昭公墓高二丈九尺。在莊公墓西南五十步。魏地形志魯有昭公墓是也。○東門襄仲墓周圍四十步。高五丈。在縣東三里。魯城內建春門南。故以姓氏為臺之名。○季武子臺高三丈五尺。在縣東二百五十

步。按春秋左傳定公十二年公山不狃率費人襲魯公。與三子入於季氏之宮。登武子之臺是也。○闕雞臺二所。高一丈五尺。相去各四步。在高門內。在縣南三里左。傳昭公二十五年季郈之鷄。聞季氏介其雞。郈氏為之。金距注云二家相近也。○孔子祠一名闕里。漢高十二年過魯。以太牢祀之。在魯城內。今縣西南二里。即鍾離意發縣。龔張伯藏壁。皆此祠累代修之不絕。郡國志云闕里背洙。面泗。有夫子床前有石硯一枚。石作甚朴。云夫子平生所用物。唐乾封中祀嶽東。回駐輦親祀於廟。開元中封王。○兩觀臺各高一丈。在縣東五十步。左傳

定公二年雉門及兩現災杜注云闕也孔子誅少正卯於兩觀之下。壽丘高三丈在縣東北六里按皇甫謐帝王紀云黃帝生於壽丘長於姬水居軒轅之丘山海經地在窮桑之際西射之南史記舜作什器於壽山。大庭氏庫高二丈在城內縣東一百五十步春秋昭公十八年梓慎登大庭氏之庫以望氣曰宋衛陳鄭災注云大庭氏古國名也譙周曰炎帝居大庭。矍相圃周迴二里高一丈在魯城內縣西南二里孔子廟在西南孔子射所。陋巷在縣城西南二里孔子廟北二百步按論語云賢哉回也一簞食一瓢飲在陋巷人不堪其

憂不改其樂。義嬪宅昔齊伐魯齊師至郊見一嬪人抱一兒携一兒軍至棄小者抱大者而去軍乃問何棄小抱大嬪人曰大者亡兄之子小者妾所生寧棄所生亡父嗣不可絕也軍義之與食而去軍乃旋師曰魯有義婦者若此。五父衢在縣東南至二里左傳襄十一年季武子將作三軍盟諸僖闕詛諸五父之衢杜注云五父衢道名在魯國東南。季桓子井深八十八尺在縣中法集寺中按史記季桓子穿井得土在即此也。臧武子井深六十尺在縣東南一百步按白衷魯記云鹿門有兩井稍小於季桓子井在鹿門西四里一為季

桓子所穿者。一雩壇在沂水之南當縣南縣里臨沂  
水論語云浴乎沂風乎舞雩詠而歸又樊遲從遊於舞  
雩之下有壇墠樹木於下可遊焉。南郊圓丘在縣南  
七里按孝經云昔者周公郊祀后稷以配天禮記明堂  
位曰成王封周公於曲阜地方百里有草車千乘孟春  
之月祀帝於郊周公得郊天故有圓丘

鄒縣

東南六十里舊十四鄉今五鄉

漢為騶縣屬魯國莽曰騶亭即邾之

地曹姓二十九世為楚所滅因魯謬云公改邾作鄒縣  
復以山為名按郡國志云騶縣本邾婁之國魯謬公改  
為鄒即邾人獲公冑懸于魚門是此邑。嶧山在縣南

二十里亦名鄒山史記秦始皇東行郡縣上鄒嶧山立  
石與魯諸儒議刻石頌秦德魯謬公改制邾作鄒山從  
邑故謂之鄒山嶧陽猶多桐栢也李斯所刻石嶺名曰  
書門始皇乘羊車登之其路猶在黃河去鄒山三百餘  
里晴明日望之纔見又郡國志云鄒山古之嶧山也有  
穴遙與洞庭通其孔可以逃難晉太尉郗鑒避胡賊于  
此山下有大驛名邾公驛。鳧山在縣東南三十八里  
詩曰保有鳧繹遂荒徐宅。鄒城叔梁紇所治之邑漢  
為縣又曰南平陽縣今廢城存。邾國黃帝後陸終之  
胤曹姓封於邾其後終絕武王復之故國城在今縣東

南周迴四里上冠山峰下踞巖壑窮邦國之勝景一曰  
邦國有數處今黃州亦是也

萊蕪縣

東北二百六十里本漢縣屬泰山郡後漢書范史

舊八鄉今二鄉云為政之所按水經云萊蕪昔齊靈公滅萊人播流  
此谷邑落蕪沒故曰萊蕪范史云魯為此縣長百姓歌  
其清儉至晉廢後魏移古羸縣於此唐貞觀元年廢入  
博城縣至長安四年又於廢羸縣置萊蕪縣取漢舊名  
屬兗州元和十四年六月兗海節度使曹華奏以縣在  
山路三百餘里人戶絕少官吏名數亦與大縣不殊虛  
置無所取請併入乾封縣詔沒之後復置。韶山在縣

西北二十里其山出鉄漢置鉄官至今鼓鑄不絕。汶  
水出此邑即閔子騫所謂則吾必在汶上矣是也西南  
流入沛。雙石郡國志云萊蕪縣南天道有石長二丈  
雙立即漢昭帝時自立也

龔丘縣

北五十里旧漢寧陽縣也屬泰山郡後漢改屬東

八鄉今二鄉平國後漢移置平原縣於寧陽縣城北九十七里今縣  
是也隋開皇十六年以此縣與德州平原縣名同遂改  
龔丘縣焉以東南二十里有古龔丘城焉。青石山在  
縣西三十里後魏有青石山祠即此也其山都是一大  
石耳發地築立高四十餘丈周圍三百里有石池二所

東西行列有類人功冬夏澄清初無耗溢祈雨輒應故  
今古祠之。故汶陽縣在縣東北五十四里其城側田  
沃壤故魯豨汶陽之田成公二年齊人歸我汶陽之田  
是也。故剛城漢為剛縣廢城在今縣東北。甌山東  
魏張華原為兗州刺史先是猛州境有猛獸為暴華原  
為令州北七十里甌山中忽有虎食猛獸都絕時人稱  
化感之至

乾封縣

東北一百六十里元二鄉

本齊之博邑春秋謂公會吳子伐齊

即此也延陵季子往齊子死葬贏博之間至漢武帝封  
禪分贏博二縣立奉高縣以奉泰山之祀後魏改博縣

為博平隋開皇十七年改博平為博城唐乾封元年高

宗封東岳改為乾封縣屬兗州。泰山一曰岱宗在縣

西北三十里尸子曰泰山中有神房河閣三十六洞天

之一也。社首山在縣西北二十六里。蒿里山在縣

西北二十五里。徂萊山亦曰尤萊山詩曰徂萊之松

後漢朱眉渠帥樊崇保守此山自號尤萊三老。汶水

源出縣東北原山西南流經縣理南去縣三里。五汶

述征記曰泰山郡水皆名曰汶今縣凡有五汶有北汶

瀛汶牟汶柴汶浯汶皆源別而流同。東岳廟在縣西

北三十里泰山下郡國志廟前有栢樹武帝所種赤眉

賊斫一樹見血乃止有嶽令掌之唐開元十三年玄宗  
登封泰山登封之夕凝氛昏晦迅風激烈皇帝出齊宮  
露立以請及明清霽旂常不搖事畢至山下日光重戴  
明曜五色千官稱賀其日大赦以靈嶽昭感封泰山神  
為天齊王○梁父古者封泰山禪梁父者七十二君玄  
宗開元十三年十二月東封泰岳曰禪梁父焉○大夫  
松始皇避雨處今猶在○謝過城有汶陽田齊以此歸  
魯以謝過故有城存○廢梁父縣在縣東南五十九里  
隋開皇二年移梁父縣於此唐武德四年移入博城置  
今廢○廢岱山縣在縣東南四十里依徂萊山北齊於

此置岱山縣隋開皇三年廢為奉高縣五年又改為岱  
山縣大業二年廢入博城縣

泗水縣

東北一百一十里  
舊十二鄉今四鄉

左傳成十八年晉侯使士魴來

乞師仲孫蔑會晉侯宋公同盟於虛打杜注虛打地闕  
學者舊傳此地即虛打也漢為下縣之地隋分汶陽縣  
於此城置泗水縣屬兗州○尼丘山在縣南五十里叔  
梁紇禱尼丘山生孔子○龜山在縣東北七十里詩曰  
奄有龜蒙春秋定十年齊人來歸龜陰之田水經注昔  
夫子傷政道之陵遲故望山而懷操今琴曲有龜山操  
是也○泗水源出縣東陪尾山源有泉四：泉俱導因

以為名。盜泉源出縣東北高徑山之陰淮南子曰孔子不飲盜泉。漏澤在縣東七十里此澤漏穴有五皆方丈餘深二丈已上其澤每春夏積水秋冬漏盡將漏之時居人知之不過三日漏水都盡以竹木作薄籬圍之水族山積也。菟裘故城在縣北五十五里魯隱公曰使營菟裘吾將老焉。泮水詩謂泮宮是也。汶陽故城漢為縣今故城在縣西梁父故城漢為縣故城在今縣北

### 萊蕪監

萊蕪監在兗州萊蕪縣之界古冶鐵之務也管一十八冶

縣監不相統

### 監境

東西一百一十五里

南北一百一十里

四至八到

圖經未有至東西二京里數

西至乾封縣界四十五里

南至泗水縣界四十里

東至沂州新太縣界七十里

北至齊州亭山縣界七十里

西南至乾封縣界五十七里



東南至沂州太縣界七十里

東北至淄州淄川縣界八十里

西北至齊州歷山縣界六十三里

戶

今管戶主五百六十二客一千八百八十九

風俗

與兗州同

土產

貢防風

出鐵

管鐵坑三

礦坑阜在縣北五里

石坑阜在監東一十里

甘土坑在監東南一十五里

管一十八冶

魯北冶在監南一百步

銅務冶在監西一里餘

杏山冶在監東五里

崑陽冶在監東六十里

萬家冶在監東五十里

安僊冶在監東南七里

汶陽治在監東一十五里

道士治在監西南七里

何家治在監西二十九里

汶北治在監西二十四里

魯西治在監西三十里

石門治在監北三十五里

新興治在監西南五十二里

魯東治在監西五十三里

石門<sup>汶城</sup>治在監北五十五里

大叔治在監西北五十二里

宜山治在監西北五十二里

汶南治在監西南七里

校勘

兗州總序

秦以魯為薛郡漢高祖更立魯國以封公主

按西漢地理志高后元年以薛郡為魯國則以魯封公主恐出於高后元年凡前言魯元者皆追書耳今云高祖立魯國未詳所本

又立泰山山陽二郡

按西漢地理志景帝分故梁國置山陽國後為郡泰山郡高帝置無分薛郡以立二郡之文若以古伯禽之國言之則泰山山陽二郡兼有齊宋衛鄭之境不

專為舊魯國今記所書未詳所本  
後漢改為任城國

按後漢郡國志任城國乃分東平國之三城為之與  
泰山山陽二郡不相涉今記所書未知所本

以太山山陽郡地兼置兗州

按泰山山陽二漢皆屬兗州無更改而魯國則前漢  
屬徐光武改屬豫州今記所云以太山山陽郡地置

兗州蓋衍文也

後魏宣武正始年又置南兗州於譙城

按後魏地形志南兗州正光中置治譙城正光乃孝

孝明帝今云宣武正始中未詳所據

又置西兗州於定陶城北齊為任城郡

按隋書地理志曲阜縣注今記當云北齊改魯郡為  
任城郡文義方暢自漢以來皆以州統郡隋初始廢  
郡為州今記自漢而下歷記兗州廢置然置州之所  
與今魯郡多不相涉似是圖經概序兗州之詳今記  
因之故州與郡頗雜揉耳

太平寰宇記卷第二十二

河南道 二十二

海州

海州

東海郡今  
理朐山縣

禹貢徐州之域書曰海岱之及淮惟徐州

東至州海北至岱南及淮虞舜亦為徐州之境周無徐州

併於青兗州則為青州之域周官職方氏青州浸曰沂沭

按沐在今沐陽縣界春秋魯國之東界詩魯頌太山巖

魯邦所瞻遂荒大東至于海邦淮夷來同海邦即今海州

之地七國時屬楚秦蕪六國以為薛郡後分為郯郡漢為

東海郡後漢至晉改為東海國後魏改東海為郯郡高齊

郡縣俱廢宋明帝失淮北地於鬱洲更置冀州梁改東  
海郡為北海郡武帝末年大江以北並附於魏武帝七  
年罷青冀二州為海州移理於舊州南龍沮故城隋開  
皇三年自琅邪城移州於今理大業三年罷州為郡唐  
武德四年減君相以郡歸順復為海州置總府領海連  
環東州四州海州領胸山龍沮新樂曲陽沐陽厚丘懷  
仁利城東海九縣六年改新樂為祝其七年以東楚州  
屬揚府又以沂州來屬八年廢環州又龍沮祝其曲陽  
厚丘利城五縣仍以廢環州之東海來屬九年廢連州  
貞觀元年罷都督府天寶元年改為東海郡乾元元年

復為海州

元領縣四

胸山

東海

懷仁

沐陽

州境

東西一百九十八里

南北二百九十里

四至八到

西北至東京一千四百六十里

西北至西京一千八百八十五里

西北至長安二千七百四十五里

東至東海縣水道九十里

南至泗州五百四十里至揚州七百里  
西至下邳縣五百五里至徐州五百六十里  
北至密州三百八十四里  
西南取沭陽宿遷徑至泗州五百里  
東南至漣水軍取官河水路三百四十里陸路二百五  
十里

東南至楚州四百一十里  
東北至沂州二百七十里  
東北至東海縣界八十里  
戶

唐開元戶二萬三千七百二十八  
皇朝管戶主六千八十八客戶七千二百四十六  
風俗

與沂州同

姓氏

東莞郡四姓 減 闕 何 公孫

人物

蕭望之東海蘭陵人

王肅東海郟人朗之子

繆斐東海朐人也其先楚元王大夫繆生避難居此繆

襲。鮑昭東海人詩入文選。何無忌東海人桓玄  
曰何無忌劉牢之甥酷似其舅。何承天東海人曾  
孫遜八歲能詩。蕭惠開蘭陵人明識過人嘗有三千  
沙門一閱其名退無所失。徐勉東海人六歲能屬  
文為吏部尚書。徐摛梁朝為左衛率。鮑泉東海人  
撰新儀二十卷。唐徐有功東海人則天時人官至司  
刑卿凡治者五百家盧黃門曰當雷霆之震能全仁恕  
千載未見其儔。吳通玄海州人與弟通微德宗時同  
為翰林學士  
土產

綾絹海味鹽

楚布以其地當楚分其布精好因名

紫菜產在郡東北七十五里海畔石上舊貢也

朐山縣旧二鄉今四鄉本漢朐縣也屬東海郡秦始皇立石海上

以為秦東門闕有鉄官後漢屬東海國晉不改宋志無  
朐縣按此前朐縣今縣西九十里故朐城是也梁于今  
縣北二里琅邪故城置招遠縣屬琅邪郡後屬魏改為  
朐縣高齊不改周武帝建德六年改琅邪為朐山郡改  
朐縣為朐山縣取界內朐山為名也隋開皇三年廢郡  
縣屬海州大業三年以海州為東海郡縣仍屬焉。碩



獲湖在縣南一百四十二里神異傳曰秦始皇時童謠  
曰城門有血城當陷沒有一老母聞之憂懼每旦往窺  
城門門傳丘縛之母言其故門傳兵乃殺犬以血塗門  
母往見血便走須臾大水至郡縣皆陷老母牽狗北走  
六十里至移伊萊山得免西南隅今仍有石屋名為神  
母廟：前石上狗跡猶存高齊天統中此湖遂竭西南  
隅有一小城餘址猶存統城古井有數十處又有銅鉄  
瓦器如塵肆之所乃知縣沒非虛。龍且故城在縣南  
六十里。鍾離昧故城在縣南百里項羽將鍾離昧所  
築昧即此縣人也。植石廟在縣北四里史記曰始皇

三十五年立石東海上胸界中以為秦東門今門石猶  
存傾倒為教段在廟北有許步今尚可識其文曰漢桓  
帝永壽元年東海相任恭修理此廟。盧石山在縣東  
南六十里按漢書云韓信為楚王都下邳又云韓信鎮  
於三盧石伊盧等三山石色黑因以為名。伊盧山一  
名大伊萊山在縣南七十五里按史記云項王亡將鍾  
離昧家在伊盧徐廣曰東海胸縣按又續郡國志云東  
海胸縣有伊盧鄉又云中盧石在東句盧在西故云  
中盧又名伊萊者盧萊二字相近流俗音訛爾寔伊盧  
也。句盧山一名馬鞍山在縣西南一百二里縣在山

東史記所傳縣有三盧之山形勾曲狀似馬鞍。孔子望山在縣西南一百六十里春秋有云此山與郟城相近當時孔子之郟問禮之時曰登此山遂以名之其山上有一石其下方平可坐十餘人山前石上有二古老傳秦始皇洗頭盆、邊髮隱并山上馬跡猶在。蠡山在縣東南二百里其山在海中四面平坦潮上半沒潮落方見故其上多蠡即螺蚌之類也。胸山在縣南二里按舊經云秦始皇東巡至胸山界此時已有胸山名。南墜星山在縣南六十里古老相傳云商時星墜于此又一有北墜星山在縣東五十里並高一里。羽山在縣西北九十里漢志東海郡祝其縣羽山在南鯨所殛處。羽潭在縣西九十里去羽山一百步一名羽池左傳鯨化為黃熊入于羽淵、東有羽山池上多生細柳野獸不敢踐又郡國志鍾離昧城南有羽泉亦鯨鯨之處其水恒清牛羊不飲。沭水在縣西一百四十里按水經云沭水出琅邪東莞縣西北大弁山流經沂州沂水縣西南入泗州下邳縣。永安堤在縣東二里唐開元十四年七月三日海潮暴漲百姓漂溺刺史杜全昭課築此堤北接山南環郭連綿七里。韓信堰在縣西十里相傳云韓信為楚王時以地濬下遂立此堰

今為大路。○廢沂州城在縣西北百四十步。按輿地志云宋太始三年失舊沂州。至五年於朐山東北僑置沂州。至泰豫元年移朐縣。就沂州。後周建德六年改沂州為朐州。隋開皇四年省。今城基存。○曲陽故城。漢縣。故城在今郡西南一百一十里。後漢省。唐武德四年復置。八年又省。○平曲故城。漢縣。莽曰端平。即漢書以此封公孫渾邪之所。又宣帝封廣陵厲王子魯為侯。後漢省。在今郡界。○故朐城。漢為縣。今廢。城在縣西南。○古盧王城。在縣西九里。按輿地志云漢舊朐縣。今海州是也。宋泰豫元年移朐山縣於廢沂州。又梁典云天監十年

四月盜殺朐山戍主劉昕。引虜徐州刺史盧昶盜朐山縣。遣震遠將軍馬儂理討之。盧昶自徐州以兵來援朐山。屯兵據守。此城權假王譙自稱盧王。因名盧王城。○古摩坡城。在縣南。按梁典云天監十年遣震遠將軍馬儂理來討陶山。至十二月剋之。盧昶挺身走儂理。遣張惠紹追之。斬首十萬。造此城。○牛欄村。郡國志云摩竺放牧之所。今民祭猶呼云摩堆。○東安故城。在郡西八十三里。漢縣。後漢省。○糜竺冢。郡國志云刻石為人馬禽獸之狀。名之為鬼市。東海縣。東水路九十鄉。本秦末田橫所保。鬱洲亦曰郁州。亦

謂之田橫為贛榆縣之地宋泰始三年失淮北於鬱洲  
上僑立青州即此地仍於州北一里置東海郡并縣焉  
即今縣又改為北海後入於魏改青州為海州仍移  
理龍沮城復於此置臨海鎮尋移東海入鎮城仍領廣  
饒一縣後周建德四年又增置東海縣隋開皇三年廢  
東海郡及東海縣因移廣饒縣於廢郡界仁壽元年改  
廣饒為東海縣唐武德四年於此置環州以水環繞為  
郡名領東海青山石城贛榆四縣八年州廢仍廢青山  
石城贛榆三縣入東海縣移縣於廢州城即此理也。  
謝祿山在縣城西一里按漢書王莽時東海徐宣謝祿

等擊王莽將田況大破之曾屯兵於山為名。蒼梧山  
在縣東北二里古老相傳此山在海中後飛至此。栖  
雲山在縣東北四十一里即巨平山之東嶺按州舊記  
梁國子祭酒明山賓父僧紹常齊武帝時以國子博士  
徵不就道路於此山此山高眇故號栖雲山。朱紫山  
在縣北五十二里山有紅壁丹崖自相輝映遠而望之  
若朱紫因名。嚮游山在縣東北一百三里海中去岫  
二十里高二里其山周迴浮海中群鳥翔集嚮然自  
相喧聒。西捍海堰在縣北三里南接謝祿山北至石  
城山南北長六十三里高五尺隋開皇九年縣令張孝

徵造。東捍海堰在縣東北三里西南接蒼梧山東北  
至巨平山長三十九里隋開皇十五年縣令元暖造外  
足以捍海潮內足以貯山水大獲澆溉。廢艾不城在  
縣北二十四里今古相傳田橫避難漢使艾不追橫而  
築後晉移贛榆縣於此北齊天保元年省。贛榆故城  
在縣東北五十里青山之陰故城猶存郡國縣道記云  
贛榆縣在懷仁縣東北三十里一名鹽倉城後漢改屬  
東海國曹魏時省晉大康中復立尋又省隋大業末減  
君相竊據海州以先有贛榆縣遂築此城因取舊名更  
置贛榆縣唐武德八年省。呂母固在縣北三十七里

巨平山南嶺上高二里按後漢書云琅邪海曲有呂母  
者子為縣吏犯小罪宰論殺之母密聚客得數十百人  
入海中招令亡命衆至數千執縣宰斬之復還海中保  
此為固遂號呂母固。田橫固在縣東北六十一里小  
鬲山孤峯特秀三面壁立俯臨深溪惟有東隅絕近人  
行累石為城漢書齊王田廣既死田橫代為王與灌嬰  
戰於瀛下橫敗及漢定天下橫懼誅與其徒屬百餘人  
入海居島中此固即橫所營處也。謝祿廟在縣西一  
里謝祿山南嶺上本名海祠後人改之因名謝祿。堯  
廟在縣西北三里謝祿山上州舊記宋泰始七年刺史

劉崇智每稱劉氏本承先後遂造此廟以時享祠。由  
吾大夫廟在縣北四十里巨平山南按州舊記有道士  
由吾道營本沐陽人精心好道學窮秘籙天意人事無  
不通隋文帝時特徵之至都拜諫議大夫卒因葬焉。  
孝婦廟在縣北三十里巨平村北按前漢書孝婦少  
寡無子養姑甚謹其後姑自經死姑女誣告吏婦殺我  
母吏捕孝婦孝婦辭不殺姑吏驗治孝婦自誣服具獄  
上府于公以為此婦養姑十餘年以孝聞必不殺姑太  
守不聽竟論殺孝婦郡中枯旱三年後太守至于公曰  
孝婦不當死前太守強斷之咎儻在是乎於是太守殺

牛自祭孝婦冢天立大雨是歲熟因立祀焉。大海在  
縣東二十八里南接胸山縣界北接懷仁縣界西趨州  
往來所渡廣二十餘里今按由此渡者

七月

內不得渡犯者多逢風沉溺惟溺所犯之人餘得  
免必公事迫急先祭請者亦不為災莊子曰夫海千里  
之遠不足以舉其大千仞之高不足以極其深禹之時  
十年九潦而水弗加益湯之時八年七旱而崖不加損  
玄中記天下之强者東海之惡焦焉惡焦山名也在海  
東面方三萬里海水灌之而即消故水東南流而不盈  
也。縣理城在鬱洲上山海經云郁州在海中郁音鬱

水經注曰胸縣東北海中有大洲謂之郁州昔有道者  
學徒十人遊于蒼梧鬱洲之上數百年皆得至道其山  
自蒼梧徙至東海之上今猶有南方草木生焉故崔琰  
述初賦曰郁州者故蒼梧山也古老傳言此島上人皆  
先是糜家之隸今有牛欄一村舊是糜家莊牧猶拈祭  
之呼曰糜即臨祭之日著犁犇執耕鞭又言初取婦者  
先必見糜即否則為祟宋泰始三年於島南垂築城置  
青州即今縣理城是也。二疏墓疏廣疏受東海蘭陵  
人也。于定公墓定國東海郟人也

懷仁縣

西北九十里  
依舊一鄉

本漢贛榆縣地按漢贛榆縣東北三

十里贛榆縣舊城是也無定屬梁於此置黃郭成後魏  
改置義塘郡理黃郭城領義塘歸義懷仁等三縣並理  
於今密州莒縣界隋開皇三年廢郡移懷仁縣理於此  
改屬海州。懷仁山在縣北四十里其山無草木生。○  
夾山在縣西三十八里左氏傳魏公會齊侯於夾谷注  
云齊地名。劍水在西南八十五里原從沂州臨沂縣  
界三畦山踈弱馬講東流入縣界。堯水在縣西南七  
十里源從沂州臨沂縣東經縣八十里入海。○故祝其  
城在縣南四十二里平地太康志云在郟東九十里春  
秋定公十八年會齊侯於祝其寔夾谷地漢以為祝其

縣宋省。懷仁故城在縣西二十三里按後魏地形志云武定七年置屬義塘郡，縣俱移就高密郡莒縣界內置在古碚陽城後改為義塘鎮。歸義城在縣北二十五里按後魏武定七年置縣屬義塘郡隋廢。武陵郡在縣南五十九里按後魏志云魏武定七年置為武陵郡隋初廢。紀鄆城在縣東北七十五里平地近海周一里餘按春秋昭公十九年齊師伐莒傳云莒子奔紀鄆即此地也。故利城漢縣故城今在縣西六十里後漢獻帝曾於此立郡宋省。海曲按郡國縣道記云漢縣後割屬琅邪郡十三州志云海曲在開陽東一

百三十里蓋在縣西界與臨沂接境漢故利城側近是也

沭陽縣 西南一百六十里元三鄉 本漢亭丘縣地今縣北四十五里厚

丘故城是也宋省文帝元嘉四年於此立僮縣屬南彭城郡梁武帝天監五年復置僮陽郡領僮縣至太清三年地入魏孝靜帝改僮陽郡為沭陽以在沭水之陽為名仍於郡東置懷文縣周武帝建德七年改懷文為沭陽縣隋開皇三年廢郡移沭陽縣入廢郡城中屬海州即今理大業十三年土人臧君相反於沭陽縣置沭州唐武德四年復為沭陽縣屬海州總章元年隸泗州按



縣地雖近海州塗出陝澤水陸艱嶮春冬則水路乾涸  
秋夏霖潦陸路瀰漫百姓患之咸亨元年又屬海州。  
韓山在縣東北五十里按州舊記韓信為楚王講武之  
所。建陵山在縣西北一百五里按漢書地理志東海  
有建陵景帝封衛綰為侯王莽改曰付亭其縣緣此名  
按山南北狹長有陵阜緣此名建陵。句廬山在縣東  
六十八里。碩蕩湖在縣東八十里與胸山連水三縣  
分湖為界。沭水在城東南七十步引東流七十里入  
車路湖水經注云沭水又南經東海厚丘縣梁天監二  
年三月土人張高等<sup>五</sup>百餘人相率開鑿此谿引水溉田

二百餘頃俗名為紅花水東流入泗州連水界。厚丘  
城在縣北六十里按地理志厚丘漢舊縣在郟城東一  
百里宋省併入褒贛縣。陰平城在縣西北六十里按  
漢書地理志稱陰平縣屬東海郡成帝封楚孝王子為  
陰平侯又晉武帝封魯芝皆此城。下城在縣南三里  
後魏帝地形志稱梁武帝置儻陽郡領下城等縣後郡  
縣皆廢今城猶存

校勘

海州總序

於鬱州更置冀州

按宋書州郡志序篇云索虜南侵青冀徐兗並皆不  
守青冀二州治贛榆之縣詳此蓋二州皆同治也鬱  
州即今東海縣古贛榆地今記既云于鬱州更置冀  
州又曰武定七年罷青冀二州為海州則上文當脫  
青字東海縣序云宋于鬱州僑立青州魏改青州為  
海州言青而不及冀蓋互舉或脫文耳洲舊作州

胸山縣

盧石山伊盧山

按史記漢書伊盧中盧皆書作盧而後漢郡國志作  
盧後魏地形志琅瑯郡海安縣有盧石山又作蘆傳  
寫皆不一今記所引三山石色黑因以為名則義當  
為盧未詳其說又中盧在襄陽非東海之伊盧顏師  
古已言之今記所云盧石在東句盧在西故言中盧  
豈遂合襄陽之中盧于此言之或今胸山縣之伊盧  
自有此名也當考

廢沂州城

按宋明帝時淮北沒寇僑立徐州置鍾離秦豫元年

移治東海胸山縣又後魏莊帝永安二年以東泰山  
琅邪二郡置北徐州後周改曰沂州並見宋魏隋史  
志詳前後史志自宋以前無沂州今記云宋泰始三  
年失舊沂州五年于胸山東北僑置沂州沂字疑作  
徐字今記又云秦豫元年移胸縣就沂州按宋志則  
秦豫元年移僑立徐州治胸縣非移胸山縣就沂州  
今記又云後周建德六年改沂州為胸州隋開皇四  
年省按隋志琅邪郡舊治北徐州後周改曰沂州又  
東海郡胸山縣舊曰胸置琅邪郡後周改縣曰胸山  
郡曰胸山郡曰胸山詳此則後周改北徐州為沂州

改琅邪郡為朐山郡非改沂州為朐州也隋志亦無  
省朐州之文按前後文意皆是誤以徐為沂轉更訛  
失耳又今記所引輿地志未見此書恐亦舛誤

